


# KA TUMELO, MOŠE

 Ke a go leboga, Mokaulengwe Neville. Dumelang, bagaetsho. Go molemo go nna fano gompiano mo motlaaganeng. Mme ke gopotse gore gongwe fa ke na le Mokaulengwe Neville go buwa mosong ona, ke tla leka bosigo jona. Mme ke ne ke lebeletse morago ko nakong ele go nna thuto ya sekolo sa La Tshipi sa rona mosong ona. Mme yona ke . . . Morena a ratile, re tla leka go—go nna le thuto ena ya sekolo sa La Tshipi.

<sup>2</sup> Jaanong, go nnile dibeke di le pedi jaanong, ka ga, e sale ke boile. Mme ke tshwerwe ke tsebetsebe thata jaaka lo tlhalogantse, gore, ko mafelong, ke ne ka nna ka nnete, ka lapa ka nnete mme ke kgona ka boutsana go tswelelela kwa pele. Mme ke ne ka tshwanela go boela fela boikhutsonyana. Mme ke ne ka tsaya malatsi a ka nna a mararo go ya kwa tlase kwa Letamong la Ngonti ya Seruruma, kwa tlase kwa Kentucky, kwa ke tsetsweng teng. Ke ne ka akanya, “Ao, ke ikutlwa fela mo go ntle thata jaanong. Ke siame.”

<sup>3</sup> Mme ke ne ka boela morago kwa gae, mme selonyana sa ntlha se se neng sa kopana le nna mo sefatlhagong ke mohuta mongwe wa kgang maleba le puso ka ntlha ya lekgetho la dituelo. Ke ne ka boela tsela yotlhe kwa tlaselase gape. Mme ke ne ka lemoga gore go ile go tsaya go feta fela beke kgotsa tse pedi go ntira ke ikhutse.

<sup>4</sup> Mme boruti jwa me bo ipaakanyetsa go dira phetogo jaanong. Mme ga ke na dikopano tse di rulagantsweng. Mme leo ke lobaka leo ka lona ke tlang fela fa thoko ka mohuta mongwe, mme ka akanya, mme jaanong dibeke tse mmalwa tse di tlang, ke tlo tsaya fela boikhutso, boikhutso jo bo feletseng, mme ke lete mo Moreneng.

<sup>5</sup> Mme ba le bantsi ba batho ba lona ka mona, ba e leng batsofe, ba nnileng le rona mo go leele ga kalo, lo gakologelwa seo se Morena neng a re se bolelela, O tlhola a diragatsa seo se A reng O tlile go se dira.

<sup>6</sup> Gakologelwang, fa ko tshimologong tota, mo kerekeng fano, mosong o re neng re baya lentswê la motlaagana, ka foo Ena a . . . Go kwadilwe, mme go ntse mo lentswêng, mo tsebeng ya setlhogo sa Baebele ya me. Mosong ole, pono e kgolo ele, ne ya re, “Ena ga se motlaagana wa gago.”

<sup>7</sup> Ke ne ka re, “Yona e kwa kae, Morena?” Mme O ne a ntlhoma kwa ntle ka fa tlase ga loapi. Mme Lentswe le ne la tla. Mme ke ne ka leba ka bo ke bona tsone difapaano tse tharo tseo, jaaka, ditlhare le maungo a tsona, jalo jalo. Lo a itse se pono e leng sona. E ne ya kwadiwa, ka dinyaga.

<sup>8</sup> Go tseyeng, maloba, buka ya kgale golo koo, ke bala tse dingwe tsa dilo tse Morena neng a dibolela, bolelela pele; tse di setseng di ne tsa diragala. Ka ga dilwana tsena tsa bonyana, le ka ga ka foo ntwana e tlileng go wediwa, mme dilo tsotlhe tseo di ne tsa nepafala.

<sup>9</sup> Fela dilo di le pedi tse di setseng, mo nngweng ya diporofeto tseo tse dikgolo. Ke gore, dikoloi di nne mo tseleng ka taolo ya remoutu, di lebelega jaaka lee, fela wena o sa e kgweetse. E a itaola. Mme foo go tlile go nna le mosadi yo mogolo yo o tthatlogang, gobane Amerika ke setšhaba sa mosadi. Mme e tla . . . Mosadi yo mogolo o tla tthatloga, mme a nne Tautona kgotsa sengwe se se jaaka seo, mo setšhabeng. Mme ka nako eo go tlile go nna le nyeletso e feleletseng. Setšhaba sotlhe se tlo lakailwa.

<sup>10</sup> Mme, seo, ke bolelela pele . . . Jaanong sena ga se Morena a bua sena. (Sengwe sele, ka ga mosadi, sone ke, sone ke Morena.) Fela nna ke ne ka bolelela pele, ka 1933, gore lefatshe le tlo kopana le nyeletso e e fedileng pele ga '77.

<sup>11</sup> Jalo, ke ne ke sa itse ka nako eo gore ba ne ba na le sengwe se se ka le lakailang jaaka ba na le sona jaanong, fela ke bone setšhaba se nyeleditswe gotlhelele, disana fela tsa ditlhare le dilo tse jalo, di setse.

<sup>12</sup> Jalo, go mo tseleng ya yone. Mme fa dilo tsotlhe tsena tse dingwe di ne tsa tla go diragala jaaka A ne a boletse, seo se tlo diragala le sone; le fela jaaka A boletse mo Lekwalong fano, se A se bolelang. Fa Keresete ne a tlile la ntlha, O tlile go tla labobedi. Mme dilo tsotlhe tse neng A di bolela di tlile go diragala. Mme re bonang tsena ka nepafalo, mme re itseng gore rona re . . . nomoro ya rona e gaufi fela le go bidiwa, jaaka setšhaba, re itseng gore Kereke e gaufi le go tsaya Phamolo ya Yona. Go ama pelo ya moruti, kgotsa modumedi ope, go itse gore re mo letsatsing lena le nako tse re tshelang mo go tsona. Ke nako e kgolo go feta thata e motho ope le ka nako nngwe a e tshetseng mo lefatsheng, ke gone jaanong; ke gore, ka ntlha ya Kereke. Jalo, ke tlhomame ke eletsa dithapelo tsa lona.

<sup>13</sup> Mme foo ke bone mo motlaaganeng, mme ke bone gore bona ba nnile le . . . ba ile go nna le ditlhopho dingwe seša le dilo tsotlhe, mo kerekeng, ka ntlha ya bangwe ba lekgotlha le jalo jalo.

<sup>14</sup> Mme—mme kereke e ne ya tlhoka kopanonyana, tlhotlheletsonyana. Mme lo nnile lo le pelonomi mo go nna, mme lo ntshagofatsa. Mme ka ntlha ya me ke le fano, e kete go nnile tshagofatso ko go lona. Mme ke tlhomame, go nneng le lona, go nnile tshagofatso mo go nna. Mme ka metlha yotlhe lo ne lo amogela se neng ke se bolela go nna Boammaaruri, ka ke bone seo ka Modimo. Mme nna—ke itumeletse seo.

<sup>15</sup> Jalo foo, ke ne ka simolola teng, mme ka nako eo ke ne ke ya go batlisisa, le go tlhamalatsa kereke ya rona, mo makgotleng a

yona, mme foo le ka ntlha ya ditlhopho le jalo jalo. Mme foo—foo, ke ne ka akanya, morago ga foo, ke tswetse koo mme ka fitlhela boikhutsonyana pele ga ke boela morago kwa mafelong gape.

<sup>16</sup> Le go tshole mo gare ga lona. Jaanong, ga se ga baarogi. Ke ga motlaagana ona. Re batla kopano le motlaagana ona, gore sengwe le sengwe, le phoso nngwe le nngwe, dilo tsotlhe tse di nnileng di diragala, mme gongwe maikutlonyana go tswa go yo mongwe go ya go yo mongwe; tseo, ke ile go tsaya mongwe le mongwe wa bona mme ke ba tlise sefatlhego se lebane le sefatlhego. Jalo fa o sa batle go lebana le gona, go botoka o katoge naga; gobane o tla go lebana sefatlhego sefatlhegong le e nngwe le e nngwe ya bontlhanngwe jwa yona, jaaka re ne re tlwaetse go dira fano mo motlaaganeng. Mme tsotlhe di tle di tsamaisiwe ka thelelo, ka gore re bakaulengwe le bokgaityadi ba ba neng ba roba senkgwe mmogo, Mmele wa Keresete, mo tafoleng ya matlhogonolo. Mme ga se sepe fa e se diabile yo o tla dirang sengwe le sengwe se nne phoso, mme a bake maikutlo, kgotsa a kgagolake, kgotsa sengwe le sengwe se jaaka seo. Mme ke tsaya Mokaulengwe Neville wa rona, re tsamaya go tloga lefelong go ya lefelong, re tlisa mmogo, batho ko bathong, go fitlha motlaagana wa kgale o boile, o tlhomamisegile gape, mo dinaong tsa ona, go tsamaya o bapile ka ntlha ya Puso ya Modimo. Jaanong, sena ke, lobaka lo neng ka bua sena, ke ka gonne se na le setlhophanyana sa rona fano mosong ona.

<sup>17</sup> Mme jaanong ke ile go nna le boikhutsonyana, mme ke boe fela ka bonako ka fa nka kgonang. Mme ke solofela go tloga ke ya kwa mafelong gape. Mme nakong ena, Morena fa a ratile, ke batla go tsaya mo go nnye mo re go kokotleditseng mo mading, le jalo jalo, ka bonna, golo koo ko . . . lenaneong lena la kanamisetso ya ditšhaba. Mme ke iponele tante e ntšhwa, le didiriso tse dintšhwa, mme ke simolole kwa mafelong. E seng go tloga kerekeng go ya kerekeng, fela go yeng ko dikopanong tsa rona.

<sup>18</sup> Jaanong, e seng go tlhokomologa bakaulengwe ba ba ntaleditseng, se e leng gore se itumedisa tota. Fela gantsi gotlhe ga yona, o fitlhela gore dikopano tsena, ba re o ile go nna teng koo, mme fa tsotlhe ditsala tsa gago di tle teng, mme foo go nne mo gontsi ga go letsa moropa ka ntlha ya tšhelete. Fela go fetsa batho bao matla. Ke fetsa go simolola go fitlhela seo, lo a bona. Jalo seo ga—seo ga se a siama. Re batla go nna le lefelo kwa re ka ba tlisang gone. Ga o a tshwanela go tlisa tšhelete ya gago. E tla fela mmogo, ka bowena, mme—mme o direle Morena. Lo a bona? Mme gore jaanong. . .

<sup>19</sup> Mme bodiredi jwa me bo tsere phetogo jaanong. Lo a gakologelwa fa ke ne ke tlwaetse go tsaya seatla sa motho, mme ke eme fela foo, mme Morena o ne a tle a mpolelele se neng e le bothata jwa bone. Ne a re, “Go tlile go tla go diragala, o itse diphiri tsa dipelo tsa batho.” Mongwe le mongwe wa lona

o a itse gore moo go diragetse fela go itekanetse ka tsela e Le e boletseng. Jaanong ena ke kgato e e latelang, e e porofetilweng mme e boleletswe pele, e e ile go nnang kgakala go fetisa epe ya Gona, lo a bona. Mme go gone jaanong ka mo phetogong.

<sup>20</sup> Mme leo ke lobaka le Satane neng a ntwantsha ka lekgetho la dituelo, e leka go mpolelela, puso, gore ke kolota lekgetho la dituelo mo leding lengwe le lengwe le ke neng ka le amogela, jaaka moruti, e sale golo ko dinyageng tse masome mabedi le metso e supa tse di fetileng, ne ke tsena bodireding. Ga go jalo, gobane e ne ya feta fa kerekeng fano.

<sup>21</sup> Ke moikannngwa wa kereke ena. Go jalo tota. Go mo makwalong fano. Jalo, ka lobaka loo, fa ke le moikannngwa-motshwaramadi wa kereke ena, foo ga go sepe mo lefatsheng. . . Puso ga e na sepe go dira le gona. Ga ba belaele kereke. Ba belaela nna ke leng motshwaramadi wa kereke. Mme baikannngwa ba saenile pampiri e e leng ko bankeng kwale, gore madi otlhe a me. . . Mo boemong jwa go nna le letlole le le leng la me, ke a fetiseditse pele go kereke ya me fano, gobane go sa laolwe ke ope yona ke letlole, ntswa go ntse jalo.

<sup>22</sup> Mme go dira jalo, go nthusa go se tshabe go tla kerekeng le go e tlogela, le go tswela kwa ntle mme ke se sepe fano. Morago ga gore ke solofetse batho gore ke tlo boela mo kerekeng, nako morago ga nako, mme ke ba thuse. Ke lobaka le ke neng ka go tshola go ntse jalo, ka gonne ke dirile tsholofetso ko go lona batho. Ke lobaka loo ke nnang le yona ka tsela eo, mo boemong jwa go nna le motho ka bongwe. Foo, fa o dira seo, e e latlhela ka kwa lekgotleng. Mme ka tlhomamo ke kगतलhanong le lekgotla. Jalo ke—ke tlile go e tshola fela ka fa e leng ka teng, ka mo diatleng tsa Modimo, gore re kgone go tswela pele ka ntlha ya Bogosi jwa Modimo.

<sup>23</sup> Jaanong, mosong ona, re batla go ithuta Lefoko lena le le segofetseng la kgale, mme re dumele.

<sup>24</sup> Jaanong, ke batla gore, gape. . . Ke bona Mokaulengwe Egan le ba le bantsi, bangwe ba baikannngwa ba ntse fano, morago ga re se na go nna le kopano ya rona ya baikannngwa, bosigo maloba; ke boammaaruri, nna mo pepeneneng fa pele ga kereke, gore mongwe le mongwe wa lona lotlhe ga a sa le moikannngwa yo o—yo o tlhomilweng. Lo baikannngwa ba ba tlhophilweng, mme leina la lona lo mo dibukeng. Go siame.

<sup>25</sup> Mme jaanong ba ile go nna le ditlhopho dingwe gape tsa—tsa batiakone, le jalo jalo. Mme Mokaulengwe Neville o, o tla bo a bitsa bao gone fela foo morago ga tirelo, go siame, mme le ka ntlha ya motshwaramadi le jalo jalo, fa re tlhoma kereke. Re nne le, medi yotlhe, e baakanyeditswe tiro, foo re ka nna le tsosoloso jaaka e tla.

<sup>26</sup> Jaanong, fela pele ga re boela morago kwa ditsebeng fano, ka ntlha ya thuto ya sekolo sa rona sa La Tshipi, ko Lefokong lena le

legolo la Modimo o o tshelang, mpe re inamiseng fela ditlhogo tsa rona, metsotso e mmalwa, fa re bolela le Mokwadi wa Buka ena. Mme jaanong bayang ka fa thoko kakanyo e nngwe le e nngwe, sengwe le sengwe se se kganetsanong, go go ganeleng gore o nne le tshhegfatso.

Mpe re rapeleng.

<sup>27</sup> Modimo yo o boitshepo go gaisa thata le yo o siameng, ka mo Bolengteng jwa Gago jo bo segofetseng jo bo sisimosang re a tla jaanong, re neela ko go Wena matshelo a rona, le mewa ya ro—ya rona ya botho, le mebele ya rona, le ditirelo tsa rona, le ditalentse tsa rona. Le tsotlhe tse renang le tsona, re di bega fa pele ka Gago. Mme jaaka O lebile mo godimo ga rona, Morena, fa go na le bolelo bope jo bo apogileng mme bo sa ipobolwa, re tla Go kopa, Oho Morena Modimo, gore O tla dirisa Madi a Morwa wa Gago, Jesu, ko lefelong le le jaaka leo. Gonne, re lemogang gore rona ka mo boroneng re a tlhabela, mme foo ga go kgonege gore rona re nne ba ba itshetsang. Fela re ikaega gotlhelele mo godimo ga Madi a Gagwe a a rategang thata, le mo tshhegofatsong ya Gagwe gore e dire mabapi le rona, gore rona baleofi ba ba senang boleng re tle re tle letsatsi lengwe ka bopelokgale ka mo Bolengteng jwa Gago, re tliša fa pele ga rona Madi ana a Morena Jesu. A e leng gore, Wena, mo dinakong tse di fetileng, o ne wa a lemoga go nna Madi a Morwa wa Gago yo a tsetsweng a le esi, mme ne wa dira tsholofetso, gore, “Ka Yena, fa re ipobola maleo a rona, re tla siamiswa ke tshhegfatso ya Gagwe.”

<sup>28</sup> Mme jaanong re tlile go kopa, Morena, gore Wena o tlaa re itshwarela phoso epe ya rona, bolelo bope jwa tlhagelo kgotsa tlolo, tlolo ya molao, gore fa kakanyo epe e e bosula e tlhabile mowa wa rona wa botho, ka metswi e e tukang ya ga diabile, gore Wena o tla kgoromeletsa ntle mmaba yo o bosula yona wa Gago, le wa batho ba Gago.

<sup>29</sup> Mme re tla kopa gore O tla romela Mowa o o Boitshepo go tsaya Lefoko ka nako ena, jaaka re ineela ka sebele re le didiriso, gore Wena o tla bolela ka rona, mme o utlwe ka rona, Lefoko la Gago. Mme mma rona re Le amogele gore le tswa ko go Wena, mme tloge fa lefelong lena, gompieno, re ikutlwa gore re ne ra busetswa mo mannong gape ka ntata ya Keresete; gore re tle re tshwanele botoka tirelo ya bosigo jona le ka moso, ka ntlha ya ketelo ya Mowa o o Boitshepo.

<sup>30</sup> Segofatsa bakaulengwe ba rona gongwe le gongwe, dikereke go ralala lefatshe, ba ba tshwereng go tsweledisa Lefoko la Botshelo mo letsatsing lena le le bosula. Re ikutlwa gore ga go nako e ntsi e e setseng ya go dira, gonne bosigo bo tla ka bonako tota. Maru a ntwā a iba gape. Bosula bo mo gaufi, mme re a rapela gore O tla re letlelela re dira jaaka go ise go tshwane le pele. Re khutsise mebele e e lapileng ya rona, Morena, mme o re

romele morago kwa tlhabanong. Gonne re go kopa mo Leineng la ga Jesu, mme ka ntlha ya Gagwe re a rapela. Amen.

<sup>31</sup> Fa re bula, mosong ona, Baebele, ko go—kgaolo ya bo 11 ya Buka ya Bahebere.

<sup>32</sup> Ka Laboraro bosigo re ne re bolela ka kgaolo ya bo 7 ya Buka ya Bahebere, ka ga “Melegiseteke, a sena ntate, le a sena mma, a sena tshimologo ya malatsi, kgotsa bokhutlo jwa botshelo.”

<sup>33</sup> Mme ke ne ka akanya, gongwe, mosong ona, go tla nna matshwanedi go bula gape Buka ena e e makatsang, ka re na le medi ko go se re eletsang go se bolela, mo go baleng ga pele. Mme fa re tlola kgaolo ya bo 10, le kgaolo ya bo 9, tse di leng melao ya dithabelo, re tla fitlha fa lefelong la “tumelo.” Mme fano mo Bukeng ya Bahebere, kgaolo ya bo 11, mme go simolola ka temana ya bo 23, re E bala jaana:

*Ka tumelo Moše, fa a tsalwa, ne a fitlhwa dikgwedi di le tharo ke batsadi ba gagwe, ka gore ba ne ba bona gore ke ngwana yo o siameng; mme ba ne ba sa tshabe taolo ya kgosi.*

*Ka tumelo Moše, e rile a fitlha ko mengwageng, ne a gana go bidiwa morwae morwadia Faro;*

*A kgetha bogolo go utlwa botlhoko jwa tshotlego le batho ba Modimo, go feta go utlwa monate wa dikgatlhego tsa boleo sebakanyana;*

*A gopola kgobololo ya Keresete e le dikhumo tse dikgolo thata go feta matlotlo a Egepeto: . . . mme ne a nna le tefo ya tuelo.*

*Ka tumelo o ne a tswa kwa Egepeto, a sa tshabe bogale jwa kgosi: gonne o ne a itshoka, jaaka ne a bona ena yo a sabonaleng.*

<sup>34</sup> Ke batla go tsaya serutwa, mosong ona, “go kgetha ka tumelo.” Mme ke rata go tsaya go nna temana, mafoko a ntlha a kgaolo ya bo 23, “*Ka Tumelo, Moše.*” Mme, “go kgetha ka tumelo,” gantsi sengwe le sengwe se re se dirang, re tshwanetse re kgethe ka tumelo. Mme tsothle tse re di fitlhelang tse Moše neng a di dira, tse di tshwanelwang go boeletswa, ne di le ka tumelo; e seng ka pono, fela ka tumelo.

<sup>35</sup> Mme lobaka lo ke kgethileng sena mo mosong ona, ka kereke mo boemong bona, e nnile seo mo go tsa rona. . . le e leng mo dikolong tsa rona, le mo gautshwanyane, re nnile le dithuto tsa ga maranyane tse dintsi jalo. Ka ntlha ya sena, re gogetse batho kgakala le tumelo. Jaanong, tumelo ga e rurifatswe ke maranyane. Tumelo ke se maranyane a sa se boneng. Mme rona. . . Fa le ka nako nngwe re ka latlhegelwa ke tumelo e kgolo ena, foo re fa bofifadung jo bo feleletseng, gona. . . go sa kgathalesege sentle ka foo re rutegileng, ka foo re ka tlhalosang Lefoko la Modimo, go siamela tsela ya rona ya go dumela.

36 Ga go tsela e seo se ka itumedisang Modimo, fela ka tumelo. Lekwalo le go bolela motlhofo ka tsela eo, mme ke ka tumelo. “Mme kwa ntle le tumelo,” Lekwalo le rialo, “ga go kgonege go itumedisa Modimo.”

37 Jalo, fa tumelo e ganetsana le maranyane, mme maranyane a ganetsana le tumelo, seo se di baya fa—fa di felelanang pelo, ka lobaka loo re tshwanetse re tseye maikgethelo jaaka Moše ne a dira. Ka tumelo re a dumela!

38 Jaanong, fa re latlhegelwa ke tumelo, ka lobaka loo ga re kitla re bona thapelo e arabelwa ke Modimo. “Gonne yoo yo o tlang kwa Modimong o tshwanetse sa ntlha a dumele gore Ena o teng, mme ke moduedi wa bao ba ba Mo senkang ka tlhwaafalo.” Jalo, fa re latlhegelwa ke tumelo, dithapelo tsa rona di a sengwa; ga re fitlhe gope.

39 Jalo seo ke sotlhe se re ka akanyang ka ga sona, mosong ona, ke go tshwarelela ko tumelong. Fong, fa re latlhegelwa ke tumelo, tshepo yotlhe ya rona e ile. Mme fa re latlhegelwa ke tumelo, bonnete jotlhe jwa rona jwa semowa bo ile. Gonne, ga o kake wa nna le tumelo mo dilong tse o di bonang, gonne tsotlhe dilo tse o di bonang di a nyelela.

40 Fa re lebelela kwa mothong mongwe yo mogolo, modiredi yo mogolo, kgotsa phuthego e kgolo, botlhe ba tlaa nyelela, letsatsi lengwe. Mme fa re lebelela kwa setšhabeng se segolo, kgotsa sebolao se segolo, tsotlhe di tlaa nyelela, letsatsi lengwe. Mme foo re tshwanetse re tshela ka tumelo, ya dilo tseo tse maranyane a sa di itsiseng. Ke ka tumelo re dumelang.

41 Jaanong, re latlhegelwa ke kgalalelo ya rona fa re latlhegelwa ke tumelo. Jaanong, fa re tloga mo tumelong, ka nako eo re isa kereke kwa mafelong a tsa botlhale.

42 Mme dinako tse dintsi, go ne ga akanngwa, mo gare ga batho, gore ka gobo phuthego e le tona, mme ba ne ba na le dikereke tse dikgolo, metšhophe e megolo, le batho ba bagolo, ba ba bantsi ba ba apereng sentle le ba ba rutilweng, mme le madi a mantsi, gore ba ne ba ka kgona go dira dilo tse jaaka tseo, rona, dinako tse dintshi, ne re gopola gore moo go a tlhotlheletsa, gore kereke e rileng ena e tshwanetse ya bo e tlhotlheletswa. Kgotsa, kgapetsakgapetsa rona re bua ka ga badiredi ba ba farologaneng ba ba yang golo kwa mafelong mme ba nne le diphuthego tse dikgolo tsa matshutitshuti, mme re akanya, ka dinako dingwe, gore ke ditshupo tsa tlhotlheletso. Fela moo ga se boammaaruri gotlhelele. Seo ke tlhotlheletso ya motho.

43 Fela tlhotlheletso ya mmannete e tla ka go dira thato ya Modimo. Lo a bona? Gongwe ke e nngwe, kgotsa fela go tlala seatla. Gongwe ke kereke e kgolo, kgotsa kereke e nnye, ga go kgathalesege. Gongwe ke sebui se segolo, sa setswerere mo puong, kgotsa fela monna o a itseng di ABC tsa gagwe ka boutsana, ga go kgathalesege. Go ikaega mo molaetseng o a o

tlisang, gongwe o tlhotlheleditswe ke Lefoko la Modimo, kgotsa, le tlhotlheleditswe ke dikakanyo tsa botlhale jwa tlhotlheletso ya motho?

44 Batho bangwe ba ka tlhotlheletswa ke ka ntlha ya sebui sa setswerere mo puong. Seo ga se go dire se siame. Ka dinako dingwe ba tlhotlheletswa ke gobo monna yo a katisitswe gore a ka dira ntlha ya gagwe e tlhaloganyege. Moo ga go kae gore moo ke ga Modimo. Lo a bona?

45 Ke fela ka Lefoko la Modimo le le elang ruri, la Bosakhutleng, re ka amogelang tlhotlholetso, mme yona e neelwa ke Mowa o o Boitshepo. Ka tumelo re a e amogela.

46 Jaanong re ka akanya ka ga Moše, le ka nako e kgolo ena ya botshelo jwa gagwe. Mme re bala kwa morago, ka ga tsalo ya gagwe, gore ka foo Modimo neng a mo tlhokomela ka teng, fela go ne ga tla nako mo botshelong jwa ga Moše kwa go neng go tshwanetse go nna le nako ya maikgethelo. Fa re bala sentle, re fitlhela gore o ne a le morwa morwadia Faro, mme o ne a le moja boswa wa sedulo sa bogosi, mme o ne a ile go nna faro yo o latelang ko Egepeto. Jalo o ne a tla lemoga fa a ne a leba mo tikologong, morago a sena go gola mme a nna le boikarabelo, mme go ne go tle go nne le makgoba ao a a dirang golo ka mo mesimeng ya seretse. Mme Moše, fa a ne a lebelela ka matlhabaphefo a mosate, ko makgobeng a a tshwanang a Faro neng a lebelela ko go ona, fela a pharologanyo e neng e le teng ko go lebeleleng.

47 Ke batla go thaya mogopolo oo, mosong ona, metsotso e mmalwa, mme mpe Modimo wa Legodimo a e kgoromeletse kwa legaeng la pelo nngwe le nngwe fano. Ke ka foo o lebelelang sengwe le sengwe, se se dirang pharologano.

48 Moefangedi yo mogolo, Johane Sprawl, yo neng e le mosokologi wa bodiredi jwa Mokaulengwe Bosworth, yo ba le bantsi ba lona ba mo gakologelwang dinyaga tse di fetileng, wa kwa Leobong la Kgalalelo la Kgale. O ne a re, letsatsi lengwe o ne a ya mosepeleng, pele ga go tlhokafala ga molekane le mosadi wa gagwe yo o ratiwang. Ba ne ba le kwa La Salle, Lorraine, Fora. Mme ke nnile le tshiamelo ya go etela lefelo lone leo. Mme mosupatsela ne a ba ntshetsa ntle ka ditshimo, mme a ba supegetsa dilo tse di farologaneng. Mme ba ne ba fitlha kwa go leng sefikantswê sengwe sa ga Morena Jesu, papolo. Mme Rrê Sprawl ne a emetse kwa thoko, a se lebeletse, ena le mosadi wa gagwe, mme, ka mo dipelong tsa bona, ne ba nyatsa se motaki ne a tshwanetse a bo a nnile le sona ka mo pelong ya gagwe, kgotsa mmetli, bogolo, fa a ne a tlhowa mo lentswêng, selo se se lebegang se le maswe thata go ka nna teng se se ka emelang go sotlega le lerato le kutlwelo botlhoko ya Morena Jesu, le ka foo se neng se lebelega se le magwata mme se kapakapilwe. Mme



mosupatsela ne a tla kwa go Rrê Sprawl, mme o ne a re, “Rra, ke akanya gore o nyatsa sefikantswê sena sa Morena Jesu.”

Mme o ne a re, “Ke a dira.”

<sup>49</sup> Mme o ne a re, “Ga ke kgakgamale le ga nnye, ka gobo batho ba le bantsi ba ba se lebelelang, la ntlha, bona ba a se nyatsa.”

<sup>50</sup> Mme Rrê Sprawl ne a re, “Goreng, ga ke kgone go bona kutlwelo botlhoko epe kgotsa tlhotlheletso epe kwa go lebelelang ko selong se se jaaka se, jalo ke a ipotsa gore ke ka ntlha eng mmetli le ka nako nngwe a neng a se dira jaana.”

<sup>51</sup> “Mme mmetli . . .” Ne a re, “Rrê Sprawl, sefikantswê sena se siame, mme mmetli o ne a na le selo se siameng mo tlhologanyong ya gagwe. Fela kwa bothata bo leng gone, ke mo go wena. Ke tsela e o se lebelelang ka yona.” Mme o ne a tsaya ena le mosadi wa gagwe ka seatla, mme a ba etelela pele golo ko aletareng kwa tlase ga sefapaano se se bolelwang. Mme ne a re, “Jaanong, Rrê Sprawl, lebelela kwa godimo jaanong.” Mme e rile a lebelela kwa godimo, o ne a re pelo ya gagwe e ne ya batla e mo palela. A pharologano e neng se le sone, go emela kwa thoko koo mme a se lebelela ka tsela *ele*, mme le go ya golo koo mme a se leba ka tsela e se neng se dirilwe gore se lejwe ka yona.

<sup>52</sup> Mme eo ke tsela e Modimo a leng ka yona. Ke tsela e tumelo e leng ka yone. Ke tsela e o e lebelelang ka yone. Fa o e lebeletse jaaka mohuta mongwe wa Baebele ya ditso, ya ga sengwe se se neng se le gone mo malatsing a a fetileng, ga o kitla o nonofela go fitlhela boleng jwa mmannete jwa Baebele. O tshwanetse o nne mo mangoleng a gago, mme o obamele ditaolo tsa Baebele ena, mme o lebelele ko go Yone ka matlho a Mowa o o Boitshepo.

<sup>53</sup> Ke tlile go botsa bareetsi bana, mosong ona. Ke molemo ofe o Modimo wa ditso a re direlang one gompieno fa A se Modimo yo o tshwanang? Ke molemo ofe o Modimo o go dirang, yo o tlišeng go tsaya Moše mme a dire metlholo e a dirileng ka ena, ke molemo ofe o go tla re direlang one go bala ka ga Modimo yo ntseng jaana fa a se Ene Yo o tshwanang gompieno? Ke molemo ofe o Modimo yo o ka gololang bana ba Bahebere, go tswa mo bokepisong jwa molelo, fa Ene e se Modimo yo o tshwanang gompieno? Ke molemo ofe o Modimo yo a tla atlholang mo gare ga ba ba siameng le ba ba phoso a leng one, mo letsatsing le le fetileng, mme a kgophola ba ba phoso le go segofatsa ba ba siameng, fa Ena e se Modimo yo o tshwanang gompieno? Ke eng se re se elang ko kerekeng? Ke goreng re ikgapha mo dilong tsa lefatshe, fa Ena a se Modimo yo o tshwanang wa dikatlholo tse di tshwanang, mme le mogopolo o o tshwanang o A nnileng ona ka metlha yotlhe? Ke molemo ofe o go tlo nnang gone gore Modimo yo o ka amang seatla sa mosadi yo o nang le pobolo ya mogote e e šakgetseng, mme pobolo ya mogote e khutle, fa O se Modimo yo o tshwanang gompieno? Ke molemo ofe o go tla nnang ona go direla Modimo yo a ka bitsang tsala ya Gagwe go tswa mo

lebitleng, morago ga ge a ne a sule malatsi a le manê, fa Ene a se Modimo yo o tshwanang gompieno?

54 Ka tumelo re dumela gore letsatsi lengwe le le galalelang O tla re bitsa go tswa mo lefatsheng, ntswa re le molora o o tlang leiso gape. Re go netefatsa jang? Ga re go netefatse. Re a go dumela. Ga re a kopiwa go netefatsa sepe. Re kopilwe go go dumela.

55 Ka tumelo Moše ne a dira *jaana-le-jaana*. Mme jaaka Moše, jaaka lekau, ne a lebelela ka letlhabaphefo la kwa mošate, ko makgobeng, o ne a bona segopa se se tshwanang sa makgoba a a leswe, a a maswefetseng, a a pagangweng ke loraga a Faro neng a a bona.

56 Mme e rile Faro a lebelela mo go bona, le Baegepeto, ba ne ba se sepe fa e se segopa sa makgoba. Seo ke sotlhe se neng ba le molemo ka ga sona; fela go nna batho ba batladiki ba seretse, go dira ditena tsa seretse tsa metsemegolo e Faro neng a e aga. Eo ke tsela e Baegepeto le Faro neng ba lebelela kwa makgobeng ka yone.

57 Fela Moše, fa a ne a ba leba, e ne e le tebo e e farologaneng e Moše neng a na le yona. Fa ne a bona, a feta go bapa le letlhabaphefo, dikgatampi tse dikgolo mo difatlhegong tsa bona, dikeledi tse neng di elela mo marameng a bona, le mebele ya bona e neng e kgopame, o ne a ba leba jaaka batho ba Modimo. O ne a sa ba lebe jaaka makgoba. O ne a ba leba jaaka batho ba ba kgethilweng ke Modimo.

58 Mme, ao, fa ke tsamaya kwa le kwa, go tloga mo lefatsheng go ya ko lefatsheng le lengwe, le go tloga mo setšhabeng go ya setšhabeng se sengwe, ke rera! E sale ke tlogela mejako ya motlaagana o monnye ona, e e leng kagelo ya makokokoko, e senang molao fa e se lerato, e sena buka fa e se Baebele, e sena tumelo fa e se Keresete, ke lekile go leba mo baneng ba Modimo, le mo ba ba gannweng, ba le jaaka batho ba Modimo ba ba kgethilweng le ba ba tlhophilweng. Ga ke ba botse fa bona ba le ba Motlaagana wa Branham. Ga ke ba botse fa bona ba le ba Methodisti, kgotsa ba le ba Mapresbitheriene, kgotsa fa ba le Mapentekoste, kgotsa Manasarini, kgotsa Boitshepo jwa Mosepedi wa Modumedi. Ke batla fela go leba mo go bone jaaka batho ba Modimo. Mme ke bonang ditirafatso tsa bona le dikgato tsa bona, gore bona ke batlhanka ba Morena Modimo. Mme pelo ya me e eletsa bokaulengwe le bona, go sa kgathalesege gore ke lefe lotshwao le ba nang nalo. Ke eletsa fela bokaulengwe jwa bona thata. Ke a ba rata ka gonne ke a itse ke batho ba Modimo.

59 Fa ke bona mosadi a fologa ka seterata, ka mothikga o mo leele, le moriri wa gagwe o dirilwe bothakga ko morago, mme—mme a apere mosese o o lebegang o tlotlega; mme ke bona mosetsana mongwe o monnye, gongwe bogolo jwa dinyaga tse di tshwanang, a apere paranyana ya mankopa; a ka nna a le, mo

ditebegong, bontle gabedi go feta mosadi wa moriri o mo leele, go ya ka tebego ya lefatshe, fela ke tla tsaya letlhakore la me le mosetsana yole yo a lebegang jaaka Mokeresete. Le fa e le gore ba tla bo ba mo tshega, mme ba mmitsa segogotlo, le fa gontse jalo, ke tla tsaya letlhakore la me. A ka nna a bo a se montle jaaka mosetsana yo mongwe, ka popego, fela o bona sengwe. Ka tumelo o bona Ena Yo a sa bonaleng, Yo a kaelang botshelo jwa gagwe.

<sup>60</sup> Motlhang ke bona monna mo tironng, a bidiwa “motiakone,” kgotsa “moreri,” kgotsa “segogotlo,” gobane a gana go goga, le go nwa biri, le go ya kwa mminong, jaaka bangwe ba bona, mme a bidiwa “segogotlo,” pelo ya me e a mo tswela. Ke mokaulengwe wa me, golo mo mmung ona wa Egepeto, seo se dira pelo ya rona e eletse thata go mo kamatlela le gore re re, “Mokaulengwe, re basepedi ba badumedi le baeng, ba lefatshe lena, mme ke eletsa thata go abalana le wena.”

Moše o ne a tshwanela go dira maikgethelo, a kgetha ka tumelo.

<sup>61</sup> Ke makau a le makae a neng a tllile go tlolela tshono ya go nna morwa morwadia Faro! Ke makau a le makae a neng a tllile go tlolela tshono e Moše neng a nna le yona, go utlwa monate wa dikgatlhego tsothle le mekgabo ya lefatshe, go nna kgosi ya Egepeto, go nna le lefatshe lotlhe fa dinaong tsa gagwe! “A selo se se bomatla,” se makau a motlha wa gagwe a tshwanetseng a bo a se gopotse, “motlhang Moše neng a kgetha go tsaya lefelo la gagwe le batho ba ba sotlegileng le ba ba utlwang botlhoko ba Modimo.”

<sup>62</sup> Gobaneng a ne a go dira? Ka tumelo, fa a ne a tsholetsa matlho a gagwe, o ne a lebelela kwa pele ga mokgabo wa lefatshe lena. O ne a lebelela kwa pele ga dikgatlhego tsa boleo. Mme Baebele e re o ne a itshoka jaaka yo a bonang Yena Yo neng a sa bonagale, ka tumelo, mme o ne a dira maikgethelo go direla Modimo yoo go sa kgathalesege gore go diragala eng.

<sup>63</sup> Seo ga se a fetoga. Ba le bantsi ba rona re ka ya ko go se re ka se bitsang kago e e botoka. Re ka utlwa monate, gongwe, bokaulengwe le menate ya go nna mo setilong sa kereke se se botoka. Re ka atlega go feta, go nwa le go goga, le go apara le go itshola jaaka lefatshe. Fela bothata ke eng? O ne wa tsholetsa matlho a gago, mme ka tumelo o bona Yena Yo a sa bonaleng, mme o ne wa tsaya boemo jwa gago le ba ba gannweng le ba ba bidiwang go twe babidikami ba ba boitshepo ba motlha. Gonne ka tumelo re bona Yena Yo a sa bonaleng, re kgetha go utlwa botlhoko jwa dipogisego le ditshotlego.

<sup>64</sup> Nka se ka ka re ko bathong gore ba tshwanetse ba kgethe go sotlega. Ga ke re gore o tshwanetse o kgethe go utlwa botlhoko. Go ka se nne selo se e leng sa botho go se dira. Fela fa go utlwa botlhoko go letse mo pateng ya boikarabelo, ka lobaka loo mpe re e amogeleng jaaka e tla. Ga ke batle gore o dire sengwe gore

mongwe a go tlaope. Nka se batle wena o bolele dilo tse di farologaneng, gore, “Nna ke . . . ke wa kereke e e sa dumeleng mo *semangmang-le-semangmang*, mo ga lefatshe,” le dilo tse di jaaka tseo, fela go dira gore batho ba go tlaope. O itlisetsa seo mo go wena. Nka se re wena o tswe fano mme o tswelole o dire sengwe se se batlang diphetogo tse dintsi. Nka seka ka batla wena o dire seo, gore mongwe a tle a re wena o segogotlo. O itlisetsa seo. Fela fa seo se letse mo pateng ya tirelo ya gago go Modimo, letlelela lefatshe le bolele se lo batlang go se bolela. O tswelole o tshele.

O dira maikgethelo. Monna mongwe le mongwe le mosadi ba tshwanetse ba dire sena.

65 Ne go tla diragalang fa Faro ne ka bo a bone se Moše neng a se bona? O ne a bona go utlwisiwa botlhoko ga batho. O ne a itse gore tlhwatlhwa ke bokae e e duelwang. Fela ka tumelo ne a e kgetha, bogolo le go nna le menate ya bolele.

66 Gongwe go na le mahumagadi a mannye, ba ba senana a a ntseng fano, jaaka basadi ba methepa ba ba kgalthisang. Lefatshe le batla go go raya le re, “Dira *jaana-le-jaana*. O montle. Mmele wa gago o bopegile bontle gore. O tshwanetse o o bege.”

67 Fela, kgaitadiake, tsholetsa matlho a gago kwa godimo mme o lebelele kwa pele ga seo, ko go Yena yo neng a re, “Ke makgapha gore mosadi a apare seaparo se se kaeletsweng monna.”

68 Fa banna ba batho ba ba leng kwa morafeng wa gago, fa basadi ba wena o ikopanyang nabo, ne ba re “Poma moriri o moleele oo. Go tla nna mo go tsididi go feta. Go tlaa nna *sena, seo, kgotsa sele*.” Kgotsa, “Go tla go tshwanela botoka.” O seka wa reetsa seo!

69 Wena o tsholetse matlho a gago, mme ka tumelo o bone Yena yo neng a re, “Moriri wa mosadi ke kgalalelo ya gagwe, mme ga a kake a o poma.”

70 Fa ba re, “Go tlo dumelwa thata. O tlo ema mo go botoka go feta ka tiro ya gago, kgotsa le mookamedi wa gago, fa o tlo nwa senotagi go itsalanya. Fa o ka goga sekarese jaaka bangwe botlhe ba basadi, o tlaa ema mo go botoka ka go itsalanya mo tikologeng ya gago.”

71 Ka tumelo tlhatlosa matlho a gago mme o lebe kwa go Ene Yo neng a re, “Itshekologise mmele ona, mme nna ke tla o senya.” Ka tumelo re dumela dilo tseo. Ga se sepe se o se boneng. Ke sengwe se o se dumelang. Ka tumelo, Moše ne a dira.

72 Mme mo mosepeleng ona wa tumelo, go tla nako fa go tshwanetseng go nne le maikgethelo.

73 Lote ne a dira phoso e e hutsafatsang eo e re e dirang. Dinako di le dintsi re kgethela molemo o e leng wa rona. Re kgetha dilo tse di tlileng go nna botoka.

<sup>74</sup> Ka nako nngwe fa go tla dikomangnyana ka mo kerekeng, mme mongwe o tlaa re, “Sentle, motiakone kgotsa modisa o ka fa letlhakoreng lena.” Se lebelelelang seo. Lebelelang go se se leng tshiamo. Ntshang selo seo mme lo ba kopantshe ga mmogo. Moo ke semodimo.

<sup>75</sup> Go na le maikgethelo. Mme re ikgethela ka borona. Re kgetha sengwe se e leng sa molemo wa borona.

<sup>76</sup> Fela Moše ne a kgetha ditshotlego le matlhabisa ditlhong, gore a tle a tsamaye le batho ba Modimo. Akanya ka ga seo jaanong. Se reetseng. “Ne a kgetha ditshotlego tsa bana ba Modimo, mme a di bala go nna letlotlo le le golo go feta, gonne o ne a itshoka, a neng a bona Yena Yo o sa bonaleng.”

Jaanong, Lote, ka nako nngwe, ne a tshwanela go dira maikgethelo.

<sup>77</sup> Mme go ka nna gore, mosong ona, gore go tlaa nna banna le basadi ba ba ntseng fano, ba ba tla dirang maikgethelo a lona a bofelo. O gompieno se o leng sone, ka gonne dinyaga di le mmalwa tse di fetileng o ne wa kgetha go nna se o leng sona jaanong. Mme se o se kgethang jaanong se tlo tlhoma se o tlileng go nna sone dinyaga tse tlhano go tloga gompieno. Dinyaga di le tlhano go tloga gompieno o ka nna monare. Dinyaga di le tlhano go tloga gompieno o ka nna Mokeresete yo o tumileng.

<sup>78</sup> Kgotsa, dinyaga di le tlhano go tloga gompieno o ka nna o le kwa diheleng, ka gonne o tsere tshwetso e e fosagetseng. Dinyaga di le tlhano go tloga gompieno o ka bo o tlhatswa dijana tsa go kgwelwa mathe ko ntlong ya marekisetso a dinotagi. Dinyaga di le tlhano go tloga gompieno o ka nna o le sepepe ko mmileng.

<sup>79</sup> Kgotsa, o ka nna o le monna kgotsa mosadi yo o—o e leng boleng ko morafeng o mongwe le o mongwe, ka ntlha ya maikgethelo a gago a Keresete. Dinyaga di le tlhano go tloga gompieno o ka nna o le kwa Kgalalelong, o ile ka mo Phamolong, ka gonne o dirile maikgethelo a gago gompieno.

<sup>80</sup> Fela o tshwanetse o kgethe. Mme o se lebe go se o se bonang. Kgetha se o se bonang ka tumelo. Seo ke selo se le sengwe se se tlaa tlhokegang, ke se o se kgethang ka tumelo.

<sup>81</sup> Lote, ka a ne a tshwanela go dira maikgethelo. Aborahama ne a neela Lote maikgethelo a gagwe.

<sup>82</sup> Mme Modimo o go neela maikgethelo a gago. “Ikgetheleng gompieno gore ke mang yo o tla mo direlang.” Ko tshimong ya Etene go ne go le setlhare sa—sa kitso, le Setlhare sa Botshelo. Motho o ne a fiwa tshiamelo ya go kgetha le fa e le sepe se a se eletsang. Mme go jalo le gompieno. O neetswe tshiamelo ya gago, jaaka moemedi o o gololesegileng wa tshiamo, go kgetha le fa e ka nna eng se wena o batlang go se kgetha.

<sup>83</sup> Tlhagiso ya me ko go wena, ke, o se lebelele ko dilong tsa segompieno tse di gautshwanyane le wena, le tumo le mokgabo

tse o ka nnang tsone. Fela kgetha, bogolo, ka tumelo, Ena yo o neng a neela tsholofetso gore letsatsi lengwe O tlaa tla mme a siamise diphoso tsotlhe, le gore o tla go neela Botshelo jwa Bosakhutleng, mme a go tsose. Go sa kgathalesege fa o tsaya tsela e e nyatsegang le ba Morena ba ba mmalwa, dira maikgethelo ao. Fa go le mathata ka mo seatleng, fa go le mathata ka mo nageng, fa go le mathata ka mo kerekeng, fa go le mathata ka mo gae, go sa kgathalesege gore a kwa kae, dira maikgethelo a gago, “Ka tumelo, ke tla direla Modimo. Ke tla ngotla pelo ya me mo Bolengteng jwa Gagwe. Ke tla tsaya tsela le bana ba Modimo. Ke a ba bona ba nyadiwa mme ba gannwe, mme ba kobilwe e bile ba tlaopiwa, fela ke sa ntse ke tla tsaya boikarabelo jwa tiro ya me. Ke tla nna gone go bapa. Mme fa ba lela, ke tla lela le bona. Mme fa go le khutsafalo, ke tla hutsafala le bona. Tsela e ba tshelang ka yona, ke tla tshela.”

<sup>84</sup> Jaaka Naomi ne a bolela . . . Kgotsa, Rute ne a raya Naomi, “Ditsela tsa gago e nne tsa me. Ditsela tsa me e nne tsa gago. Kwa o tshelang, ke tla tshela. Kwa o yang, ke tla ya. Modimo yo o mo direlang o tla nna Modimo wa me.” Tsaya maikgethelo ao, le fa go gogela thoko letlalo le le leng fa segakolodng sa gago, la go akanya gore o mongwe. Ikgagole letlalo mme o tseye tsela ya gago le ba ba mmalwa ba ba nyatsegang ba Morena, mme o nne o tshelopagale kwa mafelong a tirelo le kwa lefelong la tiro.

<sup>85</sup> Lote ne a leba go dikologa. O ne a re, “Ke na le maikgethelo.” Mme o ne a lebelela go leba kwa Sotoma. O ne a bona masimo a a molemo a a bojang a a botoka go feta a Aborahama neng a a bona, le kwa Aborahama neng a le gone. O ne a bona ditšhono tsa go fudisa dikgomo tsa gagwe, go nna le dikgomo tse di kima go feta mme di le botoka.

<sup>86</sup> Ke tshepa gore ga ke utlwise maikutlo a ope botlhoko. Fela seo e nnile boemo jwa bareri ba le ba bantsi, go tsenya Efangedi mo dipharagobeng, ba gopola gore ba bona madi a mantshi go tswa mo go yona. [Mokaulengwe Branham o opa diatla tsa gagwe gararo—Mor.] Thekete ya dijo! Ke kampa ka tshela mo lefatsheng le le senang menontshane, ke je, ke nwe go tswa mo molatswaneng, mme ke je digaugau tse tshesane tsa soda, go na le gore ke tsenye tumelo ya me mo Lefokong la Modimo yo o tshelang mo dipharagobeng. Ke tla tsaya tsela ya me.

<sup>87</sup> Bangwe ba bona ne ba re, “Billy, bothata ke eng ka kopano ya gago, ka go le Mapentekoste ba le bantsi kwa go yona.” Modiredi yo mogolo wa lekoko ne a bolela seo.

Ke ne ka re, “A lekoko la gago le tsa rotloetsa kopano ya me?”

<sup>88</sup> E se bogologolo tala, mo makasining wa *Lebelelang*, ke a dumela, go ne go le kgangnyana. Mme mokwadi o ne a re foo, ne a bolela ka ga batho ba Mapentekoste. O ne a re, “Kereke ya Pentekoste ke kereke e e golang ka bonako go feta thata mo

lefatsheng gompieno.” Goreng? Ke gonne banna le basadi ba tsholeditse matlho a bona mme ba lebelela kwa kgakala.

<sup>89</sup> Mme mokwadi gape o ne a akgola batho ba Mapentekoste. Ao, jaaka go solofetswe, o ne a re, “Go ne ga nna le bangwe ba bona ba ba neng ba batla go dira diphetogo tse dintsi, le jalo jalo. Fela, Mamethodisti ba obamela tumelo ya kereke. Ba obamela Modimo ka tumelo ya kereke. Mabaptisti ba dira se se tshwanang, le Mapresbitheriene. Fela Mopentekoste o obamela ka Baebele ya gagwe.”

<sup>90</sup> Ka tumelo re bona tsholofetso. Ke tla tsaya lefelo la me le bona, go sa kgathalesege ba nyadiwa ga kae, ke ntse ke le mongwe wa bona. Ntswa ba tlaopiwa, mme ba na le dikgatelo pele le digogelo tsa bona, jaaka Iseraele ne e dira, ga nkitla ke batla go ema le moporofeta wa maaka ko mhapheng wa lentswê, Balame, mme ke leke go hutsa se Modimo a se segofaditseng. Gobane, ka mo kampeng eo go Lefika le le betsegileng, le Setlhabelo se se madi, le Pinagare ya Molelo. Go sa kgathalesege gore ba mo gare ga eng, go ba etelela pele kwa phenyong, mme ba tshwanetse ba tle kwa go yona, gobane ke batho ba ba solofeditsweng ba ba tsamayang ka tumelo. Le fa ba se lekoko, ba ne ba le bakalakatlegi mo tikologong, mme go jalo ka batho ba Modimo. Fela ke batla go tsaya tsela ya me le bona, ke ipataganye le bona mo meleng ya bona; e seng mo makokong a bona, fela mo bokaulengweng jwa bona jwa dikgang tsa Mowa wa Bosakhutleng wa Modimo, gore, ka tumelo ke amogetse kolobetso ya Mowa o o Boitshepo. Modimo a nthuse ke nne ka metlha yotlhe ke na le mokgwa oo wa go akanya.

<sup>91</sup> Lemogang. Fa ba tswelela pele, re fitlhela gore Lote ne a bona ditšhono tsa—tsa dikgomo tse di nōntshitsweng. Ba le bantsi ba bona ditšhono tsa lokwalo lwa patana le le nōntshitsweng. Ba le bantsi ba bona ditšhono tsa maemo a a botoka a semorafe. O ne a bona dikgonagalo tsa go nna le didolara di le mmalwa tse di ngwe. O ne a bona dikgonagalo tsa go nna rratatoropo kwa motsemogolo. Neng a le moeng, mme e le monna yo o botlhale thata, jaaka ne a ntse, “Gongwe ke tla nna monna yo mogolo wa motsemogolo.” O ne a bona kgonagalo gobane di ne di letse fa pele ga gagwe. Fela ga a a ka a bona molelo o o neng o tlo senya lefatshe. Ga a a ka a itetlanyetsa, gore lefatshe le ne le tletse ka boleo, mme Modimo o ne a tshwanetse a le senye.

<sup>92</sup> Mme, gompieno, batho ba leka go itetlanyetsa ka gore, “Naare wena o . . . ?”

Ke tla re, “A wena o Mokeresete?”

<sup>93</sup> Ba re, “Ke Moamerika.” Seo ga sena sepe go dira le sona go feta go leka go raya legakabe ne e le segwagwa. Ga se na sepe go dira le sone. [Mokaulengwe Branham o itaya diatla tsa gagwe gangwe—Mor.]

<sup>94</sup> O ile go senngwa, ka gonne Modimo o siame. Mme fa Amerika e kgona go tshela ka maleo a yona, Modimo yo o siameng mme a ipusa, a le boitshepo o tlile go tshwanelega go—go tsosa Sotoma le Gomora le go ikopela maitshwarelo go ba fisa, ka ntlha ya boleo jwa bona; fa A re tlogela re kgone go tshela ka seo.

<sup>95</sup> Fa A go letlelela o fitlhe Legodimong ka ditiro tsa gago tse di nang le kgobelelo, O tlaa tshwanela go tsosa Ananiase le Safira mme a ba neele tšhono e nngwe. Go tlhomame o tlaa tshwanela go dira. Fela Ena o siame. Ananiase o ne a bona tšhelete ya gagwe. Petere ne a bona Keresete.

<sup>96</sup> Ijoo! Lote ga a a ka a bona tshenyo ya bana ba gagwe ko lefelong lele.

<sup>97</sup> Ba le bantsi ba lona, gompieno, le tshwareletse gautshwanyane mo ditumelong tsena tse di tlhwaafetseng tsa kgale le dilo, ga lo bone boganana ba bana le tshenyo ya bana ba lona. Ga o bone morwadio ka mo ntlong ya boakafadi. Ga o bone morwao e le letagwa, kgotsa kwa tafoleng ya dikarata felo gongwe.

<sup>98</sup> “Ka gonne ena o noseditswe ke sediba.” Mme boleo ga bo kgomiwe. Ga a a ka a bona mosadi wa gagwe, tlhogo ya mekgatlho yotlhe, a fetoletse ko pinagareng ya letswai, fa a ne a leba. Ga a a ka a ipona a falolela ka losi lwa maino a gagwe, ko motsemogolonyaneng felo gongwe, ka ntlha ya botshelo jwa gagwe. Ga a a ka a bona seo, gonne o ne a leba fela ko go se neng a se bona fa pele ga gagwe.

<sup>99</sup> Fela, Aborahama, ga a a ka a lemoga lefatshe le le noseditsweng ke sediba, ka gore o ne a lelaletsa matlho a gagwe kwa godimo mme a bona kamoso, gonne o ne a tlile go ja boswa jwa dilo tsotlhe. Mokeresete wa mmannete gompieno o lelaletsa matlho a gagwe kwa godimo mme a bone tsholofetso ya ga Keresete: “Go lesego ba ba bonolo gonne ba tlaa ja boswa ba dilo tsotlhe. Ba tlaa ja boswa jwa lefatshe.” Mokeresete wa mmannete, ka tumelo, o lebelela kwa godimo mme o bona seo. Mmitse se o batlang go mmitsa sona. O ne a tsholetsa matlho a gagwe. Mme e rile a dira seo, Modimo o ne a re, “Aborahama, tsamaya go ralala lefatshe, lona ke la gago lotlhe.” Ka tumelo, Aborahama ne a dira sena; tumelo e e tshwanang e Moše ne a na le yona.

<sup>100</sup> Go na ga kwadiwa ke mogasi mongwe, o neng a re. Ke ne ka akanya gore e ne e le mafoko a a mantle go fetisa thata. Gore Abora- . . . “Moše o ne a tsaya mo go gaisang thata ga lefatshe mme a go baya mo sekaleng se le sengwe; le mo go maswe go gaisa thata ga tumelo, mme a go baya mo sekaleng se sengwe; mme mo go maswe go gaisa thata ga bodumedi go ne ga nna bokete go gaisa mo go botoka go gaisa thata ga lefatshe.”



<sup>101</sup> Go jalo gompieno, gore fa re bitswa sepe se re batlang go se bitswa, “digogotlo,” kgotsa “bafodisi ba Semodimo,” kgotsa “mobidikami yo o boitshepo,” kgotsa le fa e le eng se ba batlang go se bitsa sone. Se se maswe go gaisa thata se re leng sona se tlaa nna bokete go gaisa se se botoka go gaisa thata se lefatshe le ka se kgonang. Ba batla go bidiwa “wa segologolo, yo o ratang tsa bogologolo, segogotlo.” Go tla nna bokete go gaisa se se botoka go gaisa thata se diabile a ka go neelang sone. Sona ka tlhomamo e e fetisang thata go tlaa dira jalo.

<sup>102</sup> Moše o ne a tlotla kgobo ya ga Keresete. O ne a bonela Keresete pele. Morago o ne a bolela mafoko a a maatla a magolo thata a a tlhotlheletsang ka ga Ena. “Lo a bona, Morena Modimo wa lona o tlaa lo tsosetsa moprofeta yo o tshwanang le nna.” O ne a itse. O ne a mmonela pele, mme o ne a tlotla kgobo ya Gagwe e le dikhumo tse dikgolo go feta tsa mokgabo otlhe wa lefatshe.

<sup>103</sup> Tsala ya Mokeresete, gompieno, a o ka seka wa dira seo? Mme le mokgabo otlhe le katlego ya lefatshe, ka tumelo, re bona Yena yo o solofeditseng. Le se se maswe go gaisa thata sa kereke gompieno, mo boemong jotlhe jwa yona, le fa go le jalo Se tlaa nna bokete go gaisa sengwe le sengwe se diabile a ka go neelang sona. Fa re gagogile, fa re thubegetse ditokitoking, fa re gamaregane mme re thubagakane, mo makokong le bogogotlong, go tla nna bokete go gaisa thata sengwe le sengwe se diabile a ka go neelang sona. Go tlhomame.

<sup>104</sup> O ne a tlotla kgobo ya ga Keresere e le dikhumo tse dikgolo go feta otlhe matlotlo a Egepeto. Ka lobako loo o ne a tshwanela go dira sengwe. O ne a latlha Egepeto. Ao, ke rata lefoko leo. O ne a latlha Egepeto. Lo a bona, o ne a lebeletse ka letlhabaphefo le le tshwanang, fela o ne a bona go farologana le Faro. Go ne go tla diragala eng fa Faro ne a kgonne go bona bofelo jwa gagwe? Go ne go tla diragala eng fa Faro a ka bo a bone setšhaba sa gagwe se nweletse? Moše o ne a go bona. Jang? Ka maranyane? Ka tumelo, Moše ne a go bona. Sengwe le sengwe se a se dirileng e ne e le ka tumelo, gobane Modimo ne a solofetsa Aborhama, rragwe, gore Ena o tla—Ena o tla etela setšhaba sena morago ga dinyaga di le makgolo manê, mme o tlile go ba falotsa. Mme ka tumelo, Moše ne a dumela Lefoko le Modimo neng a le bua, mme ne a itse ka boene, jaaka tumelo, go nna moeteledi pele yo neng a kgethilwe go ba falotsa. O ne a itse kwa neng a le gona. O ne a tsaya lefelo la gagwe ko dikgatamping tsa bolele, jaaka momategisi wa seretse, mme a bala kgobo ya ga Keresete dikhumo tse dikgolo thata go feta go nna mo sedulong sa bogosi sa Egepeto. O ne a tsaya. . . Ga a a ka a re, “Ke utlwa botlhoko le yona.” O ne a tsaya lefelo la bona mme a tsamaya le bona! Kgalalelo go. . . O ne a tsaya lefelo la bona. Re ne ra tsamaya le bona.

<sup>105</sup> Ga e kgane mokwadi yo o tlhotlheletsegileng ne a re:

Ke tla tsaya tsela le ba mmalwa ba Morena ba  
ba nyatsegang.

Ke simolotse le Jesu, jaanong ke a tswelela.

Ke mo tseleng ya me go ya kwa lefatsheng la  
Kanana. (Go tlhomame.)

<sup>106</sup> Moše. Go ne ga buiwa ke mongwe gore Moše o ne bogolo a ka, fa a ka bo a nnile morwa Faro mme a nna le mokgabo wa lefatshe, ena bogolo a nne morwa Aborahama go feta gore a nne morwa Faro. Morwa Aborahama, yo o tlhoilweng, go na le go nna morwa Faro, kgosi.

<sup>107</sup> Bogolo ke nne morwa Morena Jesu, le motlhanka mmogo le Ena, mme ke tseye lefelo la me le batho ba lefatshe lena ba ba gannweng, go na le go nna Tautona ya Mokgatlho ona wa Mafatshe o mogolo wa Amerika, kgotsa go nna Elvis Presley mongwe, kgotsa Pat Boone mongwe, kgotsa le fa e le mang yo o batlang go le dira ena. Ke tla tsaya tsela ya me.

<sup>108</sup> Methepana e tshwanetse go tsaya tsela ya yona. Fa boemong jwa go nna Ma—Marea Pickford mongwe, kgotsa moanelwamogolo mongwe wa ditshwantsho tsa motshikinyego, mosetsana mongwe wa mokgabo, tsaya tsela ya gago le ba mmalwa ba ba nyatsegang ba Morena.

<sup>109</sup> Go botoka nka nna moreri mo felong ga thereelo, ke rera dikhumo tse di sa itsiweng tsa ga Keresete, go na le go nna moanelwamogolo mongwe wa ditshwantsho tsa motshikinyego tsa Holiwudu, kgotsa motho mongwe yo o mogolo thata go feta mo lefatsheng. Fa ne ke tshwanetse go ja mo gonnyennyane, ke lopa dikatso, kgotsa le fa e ka nna eng e neng ke tshwanetseng go e dira, ke tla tsaya tsela ya me le batho ba Morena. Ka tumelo, ke dira seo. Ke ne ka neelwa tšhono. Fela, ka tshegofatso ya Modimo, ke ntse ke bona ka tumelo.

Ka tumelo ke kgona go le bona le le kgakala;

Mme Rara wa rona o letile golo kwa tseleng,

Go re baakanyetsa lefelo la bonno Koo.

<sup>110</sup> Monna wa lekgetho la dituelo ne a re, maloba, “Goreng o ne wa neela legae la gago ko kerekeng ele? Ke eng se neng sa go dira gore o neele motlaagana o o lebegang jaaka matlakala legae la didolara tse dikete di le masome mabedi le metso e metlhanu?”

<sup>111</sup> Ke ne ka re, “E ne e se kereke e ke neng ke go e direla. Ke batho ba ba leng koo.” Ga ke na dipe tsa dithoto tsa lefatshe lena. Papetlana nngwe le nngwe e ke kileng ka e tsaya ke ne ka e neela kereke ena. Goreng? Tumelo ya me e mo go Modimo, mme e seng mo dilong tsa lefatshe lena. Dithato tsa me di kwa godimo. Mme ke dumela gore le tsa lona lotlhe di a tshwana, fa lo siame le Modimo. Ke boammaaruri, gore lo jalo. Rona, ka tumelo, re a amogela. Rona, ka tumelo, re dumela Modimo.

<sup>112</sup> Moše, o ne a tshwanela go dira maikgethelo. Mme o ne a tshwanela, morago ga go dira maikgethelo, o ne a tshwanela go

lwantsha tumelo, foo, gonne o ne a sa tshoge tšhakalo ya kgosi. Jaanong, ka botho, o ne a na le tshiamelo ya go tshoga bogale. O ne a na le tshwanelo ya go tshoga bogale jwa kgosi, fela ga a ka. Ga a a ka a go dira, gobane o ne a na le tiro e neng a tshwanetse go e dira, mme o ne a le motlhomagang wa maikarabelo. Mme o ne a sa kgathale gore kgosi e ne e reng ka ga seo. O ne a tsaya tsela ya Gagwe le fa go le jalo.

<sup>113</sup> Jaanong, Faro, jaaka go solofetswe, fa a bona gore o fentswe, o ne a batla go neela Moše le bana . . . O ne a re, “Go siame, ke tla go bolelela ke eng se ke tla se dirang. Lona lotlhe lo nne fela mo lefatsheng mme lo ye golo koo go ntshetsa Modimo wa lona setlhabelo.”

<sup>114</sup> Eo ke tsela e diabole a dirang ka gona. “Ao, o ka nna yo o dumelang. Goreng o sa ye golo koo mme wa ipataganya le kereke nngwe? Ga o tlhoke gore o dire dilo tsotlhe tsena.” Monna o raya mosadi wa gagwe a re . . .

<sup>115</sup> Mosadi a re, “Mogatsake, ke ne ka bolokesega. Ga go sa na go tlhokomela le go penta manala gape, kgotsa pente ya dipounama le dilwana. Ga go sa na gope ga tsena. Ga go sa na meletlo. Ga go sa na sepe sa dilo tsena tsa morafe. Ke tswile mo go tsona! Ke tla baya nako ya me mo go baleng Lefoko, ke tlhokomela legae.”

<sup>116</sup> “Jaanong, bona, moratwi. Wena, o ka nna yo o dumelang, go siame. Jaanong, bona, wena—o ye golo *fano*. O fitlhetse kereke e e phoso.”

<sup>117</sup> Nnyaya, ga o a dira. O ka mo go e e siameng. Fa o na le moreri yo o tlaa go rerelang seo, o tshwanetse o nne le sone. Batlisisa kwa morago mo gare ga Dikwalo mme o fitlhele fa seo se siame.

<sup>118</sup> “Ao,” ne a re, “e ya golo *fano*. Ga ba—ga ba a tshwanela go dira seo golo fano. Lo a bona? Golo fano ga ba dire seno.” Eo ke tsela . . . “E ya fela go le bokana.” Fela ga a batle wena o tswelentele ga lefatshe. Eo ke tsela e diabole a dirang ka gona. Ga a batle o tswe mo dilong tsa lefatshe; tsenya fela lefatshe le kereke.

<sup>119</sup> Maloba, ke fologa ka tsela, ke ne ka tshuba seromamowa sa me. Mme go ne go le ko—kopelo, mme ke nnile ke reeditse, mme ke ne ka tshwanela go tsaya, go batlile, pina yotlhe, pele nka kgona go bolela ge gotlhelele e ne e le kopelo ya sedumedi, kgotsa diabole o ne a leka go tliša tlase dilo tsa Modimo mo bolekanong jwa ga tsa lefatshe. O ka seka wa dira seo! Modimo a nne le boutlwelo botlhoko!

<sup>120</sup> Ga ke kgathale gore ke dikgobokanyo di le kae tsa dipina tse Elvis Presley a di kwalang, tsa dikopelo tsotlhe tse di molemo tsa bodumedi. O sa ntse a tšenwe ke diabole. O rometse bana ba ba fetang kwa diheleng, le dikgato tsotlhe tse ke di itseng, mo lefatsheng lotlhe mo letsatsing lena. Pat Boone le bone botlhe ba bona, o ne a le wa kereke ya Keresete; mme Elvis Presley, Mopentekoste; ke bo Jutase Isekariota, mo sebopegong sa banna bao. Diabole o leka go tliša dilo tse kwa godimo tsa Modimo, gore

ba kgone go di tlhakatlhakantsha fa fatshe *fano*. Batho ga ba na go lebelela godimo kwa Godimo ga, *Sena*. Ba lebelela fela *fano*, ba re, “Sentle, gotlhe go a tshwana.” Ga go tshwane. E tswa mo lefatsheng.

<sup>121</sup> Ne a re, “O ka tsamaya fela malatsi a mmalwa. Mme o tsamaye, o nne mo lefatsheng.” Go tlhomame, o itsile gore ba tlo boela morago. Foo o ne a fitlhela gore seo ga se na go dira, jalo o ne a akanya sengwe se se farologaneng. O ne a re, “Ke tla go bolelela gore o direng. Lo tsamaye le ye gongwe le gongwe kwa lo batlang go ya gona, fela lo tlogele basadi ba lona botlhe, bana ba lona botlhe, le dikgomo tsotlhe tsa lona, fa morago *fano*. Lo di tlogele fano, mme lona lo tswela ntle.” Ka gonne, o ne a itse gore ba ne ba na le ditsabona kwa morago kwale, tse di neng di tlile go ba raela kwa morago.

<sup>122</sup> Mme seo ke se diabile a go bolelelang sona. Fela fa o tlogela dingwe tsa dilo tsa lefatshe di lepelela mo go wena, o santse o batla go goga, o batla go nwa, o batla go apara jaaka lefatshe, moo go molemo jaaka diabile a batla.

<sup>123</sup> Ke utlwa mo gontsi gore ka go kgeloga. Ga ke akanye gore go na le kgelogo e kana ka e batho ba akanyang gore e teng. Ba tlogela fela mo gontsi thata ga ditsabona ko Egepeto go ba raela kwa morago, ke gotlhe. Dikgelogo ga se se ba reng ke tsona. O tlogetse mo go ntsi ga lefatshe ko morago koo, mo go go raelang.

<sup>124</sup> Mokaulengwe, ke a go bolelela, fa Iseraele e sena go ipaakanya, e le bosigogare, ba ne ba tsere sengwe le sengwe se ba neng ba na le sona mo lefatsheng lena, se phuthilwe mme ba ipaakanyeditse go tsamaya.

<sup>125</sup> Modimo re romelele tsosoloso e jaaka eo. Re phuthe sengwe le sengwe, mme re ipaakanyetsa go tsamaya. Selelo sa bosigo gare se a tla, “Tswelang kwa ntle go Mo kgatlhantsha.” Botoka o nne le tsotlhe di phuthilwe. Wena go botoka o se nne le sepe, lefatsheng lena, se se go raelang morago, dikgole dipe go go gatelela fatshe. Phutha. Nte re ipaakanyeng. Re a tsamaya.

<sup>126</sup> Mme lo a itse ke eng? Ke a lo bolelela, ba ne ba tshepega gore ko Modimong, go fitlha Faro a ne a gakala thata kwa bogareng ba bosigo, o ne a re, “Tswayang! Tswayang, mme lo simolole go tsamaya. Tsayang sengwe le sengwe se lo nang naso, le tsamayeng!”

<sup>127</sup> Ke itumetse thata gore motho a ka tshela gaufi jaana le Modimo, go fitlha diabile a sa itse se a tshwanetseng go se dira ka ena. Ke gone. Tswaya! Simolola go tsamaya! Ikobele Modimo!

<sup>128</sup> Ka tumelo, o ne a bona tsholofetso. Motladiki wa seretse, kgotsa e seng motladiki wa seretse, o ne a tsaya tsela ya gagwe le ba ba mmalwa ba ba nyatsegang ba Morena. Faro ne a re, “Tsayang tsotlhe tse lo nang natso mme lo tsweng fano! Ga

ke itse gore ke dire eng ka lona.” O ne a tshepagala gore ko Modimong, ka tumelo.

129 Tumelo e tlaa dira metlholo, fa o tla nna o tshepafala ko Modimong. Ka tumelo, re a Mmona.

Nako ya rona e fedile; re fetile nako.

130 Fela, ka tumelo, mosong ona, tsholetsa matlho a gago. O se bone se se gautshwane le wena, lefatshe lena la segompiano, fela leba mme o bone Yena Yo a neetseng tsholofetso. Baebele ne ya re, “Ga re bone dilo tsotlhe ka boitekanelo jaanong, fela re a bona Jesu.” Lo lebeleleng mo go Ena, mosong ona, mme ditsela tsa lona di tlaa fetolwa.

131 Fa re inamisa ditlhogo tsa rona, motsotso fela, ka ntlha ya lefoko la thapelo. Nte Morena a oketse ditshegofatso tsa Gagwe mo Molaetseng.

132 Akanya ka mo pelong ya gago jaanong. A o nnnile o lebeletse mo dilong tsa lefatshe? Ka tumelo, a o bona Jesu? A o lebeletse kwa katlegong ya gago, kereke ya gago? Se boemo jwa gago jwa semorafe bo leng sona le lefatshe? Kgotsa, a o bona Jesu Yo neng, mo kutlwelobothokong, neng a Ipaye kwa letsogong le legolo la Motlotlegi o o kwa Godimo, Yo neng a utlwa botlhoko e le motswasetlhabelo, mosiamme ka ntlha ya basiamologi? A lo ka se tsholetse matlho a lona mme la bona Setlhare seo sa Botshelo kwale? Ka lobaka loo, tlogelang setlhare sena sa maranyane le kitso, mme lo Mo direle.

133 A o batla go gopolwa mo thapelong pele ga nka rapela? Tsholetsa seatla sa gago, ka ntlha ya topo nngwe le nngwe e o ka nngang le letlhoko la yona. Modimo a go segofatse. O bona botlhe seatla sa lona.

134 Fa o le moleofi, tsholetsa matlho a gago mme o lebelele jaanong. Fa o ne o le yo o itlhokomologileng, fa o ne wa nna le di komangnyana le dilonyana, ke pharologano efe e seo se e dirang? O ile go swa lengwe la malatsi ana. Letsatsi lefe? Gongwe gompiano! Ga o itse. Oura go tloga jaanong, o ka bo o le kwa diheleng, kgotsa o ka bo o le ko Legodimong. Fela o tshwanetse o kgethe jaanong. Fa go le sengwe mo botshelong jwa gago se se sa siamang, o kgethe jaanong, ka tumelo.

135 O re, “Sentle, fa fela nka ipusolosetsa ko mosading! Fa nka ipusolosetsa ko monneng!” Go sa kgathalesege gore ba dirileng, kgetha Botshelo. Kgetha Botshelo.

136 Gonne, Jesu ne a re, “Fa go tswa mo pelong ya gago o sa itshwarele motho mongwe le mongwe ditlolo tsa bona, le Rara wa gago wa kwa Legodimong ga a go itshwarele.” Jalo tlhaloganya seo thata. Fa go le sengwe se le sengwe mo pelong ya gago kgatlanong le motho yo mongwe, moleofi kgotsa moitshepi, o mo kotsing ya molelo wa dihele.

137 Jaanong tsholetsa leitlho la gago kwa godimo. O bona eng, mmaba wa gago? Kgotsa, o bona Mopholosi wa gago? Ke eng se o se lebeletseng mosong ona?

138 Fa o lwala, mme ngaka ya gago e re ga o ka ke wa siama, lelaletsa leitlho la gago kwa godimo, ko sefapaanong, kwa A neng a phololelwa ditlolo tsa rona teng, ka dingalo tsa Gagwe re ne ra fodisiwa. Se lebelele kwa go se ngaka a se buang; o dira mo maranyaneng. Tumelo e dira mo mafelong a Mowa le Modimo. Mma re akanyeng ka dilo tsenja jaanong fa re tshotse diatla tsa rona di tsholeditswe. Modimo o di bone.

A re rapeleng.

139 Oho Modimo wa Bosakhutleng, mo tidimalong ya kobamelo ena jaanong, morago ga Molaetsa o sena go tsewelela, se letle dipeo tseo tsa Lefoko la Gago, Morena, di wele mo mmung o o maje. Se letle Molaetsa, Morena, o wele mo ditlhatshaneng tsa mosetlho, mo mitlweng, gore matshwenyego a lefatshe lena (jaaka Lote) a tle a o kgame, kwa bofelong, o nne selatlihiwa. Fela, Oho Modimo yo o segofetseng, o letle o wele fa mmung o o molemo, o o ungwang, mo dipelong tse di ikwatlhayang. Mme le mo go ya me, le nna, Morena, gore rotlhe re tle re kgone go lebelela ka galase ya Modimo ya go lebelela, mme re bone Kereke e e gannweng ya Morena Jesu, batho ba ba gannweng, tsela e e gannweng, mme mpe re tsamayeng mo tseleng ena e e galalelang.

140 Jaaka Moše, o ne a sa itse kwa a yang gona. Batho ba ne ba sa itse kwa ba neng ba ya gona. Ba ne ba sa itse gore ba tsamaye ka tsela efe. Ba ne ba simolola fela.

141 Mme, Oho Morena Modimo, fa sefela sena se sentle se tshamekwa, ka tumelo re kgona go bona Lefatshe lele kwa kgakala. Letla go nne fela jaanong, gore banna le basadi ka fa teng fano ba ka seka ba akanya ka ga se lefatshe le ileng go se bolela, kgotsa ka foo ba tsamayang. Mma ba tthatloge fela mo moweng wa bona, mme ba tsamaye.

142 Moše o ne a latela Lesedi, mme Le ne la mo etelela pele kwa lefatsheng la tsholofetso. A neng a sa itse kwa neng a ya gona, fela o ne a tsamaya ka mo Leseding, go ya ko lefatsheng leo le le neng le le lentle go feta letsatsi.

143 Go letle, Morena, gompieno, gore ba le bantsi fano ba tlaa tsamaya mo Leseding la Lekwalo le mo bokaulengweng jwa Mowa o o Boitshepo, mme le Kereke; Kereke; Maitibolo, bana ba ba tsetsweng seša ba ba amogetseng Keresete, mme ba tladitswe ka Mowa o o Boitshepo, ba eteletswe pele ke Mowa. Mpe re tsamayeng ka mo bokaulengweng jona, mmogo, gautshwane le dikgang tsa Modimo, re Mo direla mo kolobetsong, mo go ingotleleng loso lwa Gagwe, phitlho, le tsogo. Mma re Mo direleng mo taolong ya Gagwe, "Letang kwa Jerusalema go fitlha lo neelwa Thata e e tswang kwa Godimo." Mpe re Mo direleng mo phodisong e e Semodimo, re rapelela balwetse. Mpe re Mo

direleng mo selalelong, mo go robeng senkgwe, ka bongwefela jwa pelo, bokaulengwe gautshwane le Lefoko la Modimo. Mpe re Mo direleng mo go tsothle dilong tsa Semodimo tsa Gagwe, go fitlhela Lefatshe le bonala mo matlhong. Go letlelele, Morena. Reetsa thapelo ya rona, jaaka re go neela gotlhe ko go Wena jaanong, mo Leineng la Morena Jesu.

<sup>144</sup> Jaanong ka ditlhogo tsa rona di inamisitswe, ka tidimalo, ka bonya, mpe re opeleng fela kopelo ena. Jaanong sena ke kobamelo. Molaetsa o fedile. Go se tsamaye ope. Didimalang fela. A re obameleng.

<sup>145</sup> Molaetsa ke tolamiso. Akanya jaanong ke eng se o se dirileng, ke eng se o tshwanetseng o ka bo o se dirile, ke eng se se go dirileng se o leng sona gompieno. Ke eng se se go dirang o kgalwe, gompieno, ke gobo o dirile sengwe maabane. Go tlile go nna eng ka moso? Se siamise gompieno, mme o tlile go gololesega ka moso. Lo a bona? O tshwanetse o dire maikgethelo. O ka a dira jang? “Ka tumelo, nna jaanong ke letlelela sengwe le sengwe se gololesege. Nna jaanong ke a golola, mme lengwe la malatsi ke a ya golo Kwale.”

Mo botsheng kgantele,  
Re tlaa rakana mo le lentl- . . .

Obamelang fela Morena mo moweng wa lona jaanong.

Mo botsheng kgantele,  
Re tlaa rakana le Kereke eo e e nyatesegang.  
(Go tsamaega bokete, fela re tla rakana  
lengwe la malatsi.)

Ko Ntateng wa rona yo o pelontle kwa godimo,  
Re tla ntsha dikgafela tsa rona tsa pako,  
Ka ntlha ya neo ya Gagwe ya lerato,  
Le masego a re itshepisang . . .

Le ba ba mmalwa ba ba nyatsegang ba Morena, ka tumelo, ke a kgetha.

Mo botsheng (mo botsheng) kgan . . . (kgantele)  
Re tla rakana ko letshitshing lele le lentle;  
(kgantele)

Mo botsheng (mo botsheng) kgantele,  
Re tla kopana mo letshitshing lele le lentle.

Go Lefatshe le le . . .

Mo obameleng fela. Ena ke kobamelo.

. . . tumelo ke kgona go bona,

Ka tumelo ke dira maikgethelo a me.

Ao, Rara o letile . . .

<sup>146</sup> Ke bona botlhe ba Morena golo Kwale; Mokaulengwe George, Mokaulengwe Seward, baitshepi botlhe.

. . . rona lefelo la bonno Teng. (Ee, Morena!)  
E e botshe. . .

<sup>147</sup> Ntate wa gage, Howard, Edward, botlhe bailshepi ba ba tsofetseng ba ba neng ba tsaya Tsela, ko morago kwale, bogologo tala.

Mo botsheng (Ee, Morena!) kgantele  
(kgantele),

Re tla rakana ko letshitshing le lentle lele.

Re tla opela mo le lentl- . . . (Oho Modimo!)

Dikopelo tse di monate tsa ba ba sego,  
(Kgalalelo ko Modimong!)

. . . ra se tlhole re hutsafala,

Go se phegelo boemong jwa ditshegofatso tsa  
Lefelo le le boikhutso lele.

Mo botsheng, botsheng kgantele. . . (kgantele)

Re tla rakana mo le lentl- . . .





*KA TUMELO, MOŠE* TSW58-0720M  
(By Faith, Moses)

Molaetsa ona ka Mokaulengwe William Marrion Branham o rerilwe la ntlha ka Sekgowa mo mosong wa Letsatsi la Tshipi, Phukwi 20, 1958, kwa Motlaaganeng wa Branham mo Jeffersonville, Indiana, U.S.A. O tserwe mo theiping ya makenete mme wa gatiswa ka Sekgowa o sa khutswafadiwa. Phuthololo e ya Setswana e ne ya gatiswa le go abiwa ke ba Voice Of God Recordings.

TSWANA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kitsisô ka tetlokhopi

Ditshiamelo tsotlhe di sireleditswe. Buka e e ka gatsiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwe go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwa go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)